


مختصر الكلام بالاديان والاساطير بالعامية الاردنية



شادي العبادي

الصابئة المندائية - الناصورائيون

الصابئة المندائية-الناصرانيون

تعتبر الصابئة واحده من اقدم اديان الشرق القديم فبرجح بعض علماء الاديان انه دين الصابئة المندائية ليهم جذور مع دين اقدم وهو دين "الناصرانيون"، والناصرانيون يعتبروا هم مؤسسين اول مدينة بتاريخ (اريدو) وكمان مؤسسين اول معبد بتاريخ معبد الاله "ايا" إله الماء الجاري .

طبعا مع انه اليوم في شبة اتفاق على انهم اقدم دين بشرق القديم (حاليا) ولكن مع هيك اقدم دليل اثري ليهم يرجع للقرن الثاني بعد الميلاد!! يعني بعد عيسى .

مع هيك بشوف الباحثين انهم اقدم من هيك بكثير بسبب انه كتبهم بتذكر كثير عقائد قديمة جدا، بترجع لعصور قديمة زي السومرين بل حتى العصور الحجرية !!

١ - المؤسس.

بدعي الصابئة المندائين انه اول مندائي كان هو النبي ادم ! وبدعوا انهم معاهم صحف ادم ،بس طبعا لحد هسه مافي دليل على هل كلام عشان هم برفضوا لحد ساعه يطلعوا هاي المخطوطات ، بعد ادم "سام" وسام هو ابن النبي نوح فهم بنسبوا حالهم له سام.

ولكن يعتبر اهم شخصية عندهم هو النبي "يهيايهانا" اللي هو بالاسلام النبي "يحيى" وفي المسيحية "يوحنا المعمدان"

يعتبر يحيى هو اهم شخص عندهم فهو اخر نبي عندهم وممكن نحكي انه هو المؤسس الحقيقي لدينهم.

٢- فكرة ماذا بعد الموت .

بالنسبة لموضوع ماذا بعد الموت، فالموضوع معقد عند الصابئة فهم دين غنوصي ! فهم بأمنوا انه العالم اللي احنا فيه هو عالم غير ظاهر ، والطريقة للخلاص هي بالخروج من العالم المادي والتخلص من الجسد. ممكن افضل طريقة عشان اشرحكم ايمانهم في مايخص الروح موجود بالنص التالي :

تكلم المسيح مخاطباً يحيى في اورشليم: يا يحيى ، أستحلفك بالحي، العظيم وبملاك الأحد الوقور، وبالدرّب الذي سلكه المختارون الصالحون، حدثني ماذا تشبه سفينة صورائيل؟ أخبرني عن النفس كيف تغادر الجسد وبماذا تكون متلفعة؟ وماذا تشبه وهي داخل الجسد الفاني ؟

لما توقف عيسى تكلم يحيى وقال بصوت عالي النفس محتجة ، تدخل خفية إلى الجسد الفاني ، وعندما يحين الأجل تنسل خفية متلفعة برداء النور وتصعد السفينة صورائيل. تظهر ثلاثة أشعة من الضوء تلحق بها ثم تجتازها. الأول يجتازها تاركاً إياها عند المساء، والثاني يتركها عند الفجر، أما الثالث فيغادرها تاركاً لها راية بيضاء .

تغضب النار، تتحرك النسمة (الروح) منسلة من القدم إلى الركبة، وتقرب من الخاصرة، وتصل إلى القلب قابضة عليه، ثم تصعد حتى تأتي اللسان وتلتف عليه، فتغيم عينا الإنسان وتشحب سيماؤه وشفته. فيناديها صورائيل قائلاً: انفصلي أيتها النسمة، لماذا ترقبين الجسد؟ فتجيب: يا صورائيل أخرجني من جسدي، أمنحني لباس وحررتي. يقول لها : هات أعمالك، فإن الأجر هو الذي سيمنحك رداءك. فتجيب: لا أعرف يا صورائيل أن أجلي قد حان، أنهم أرسلوك إلي. فإن كانت أعمالني حسنة أحضر ملابسي والبسني إياها.

تخرج النسمة. يحمل الجسد أربعة رجال يرتدون ملابس النور، يسرون نحو المدفن، يضعونه في حفرة ضيقة وبهدوء يوارونه الثرى. يحزن مكتوم ينسحبون الواحد بعد الآخر تاركين الجسد المغيب في اللحد. بعد ذلك يحضرون قدحاً من الماء وبعضاً من الخبز، وينسون الجسد.

وطبعا النص بس بشرح شو بصير لما الروح تطلع وتبلش تتحاسب، وهل موضوع طويل وبديش ادخل فيه عشان هو كبير كثير، ولكن راح نحكي عن الجنة والنار عندهم .

بالنسبة للجنة عندهم الجنة بتتقسم لقسمين

الاولى

هي جنة من النور مافي موت ولا في تعب ولا في اشي من الظلام والشر، وهناك بتعيش الارواح بسلام، وبحكم العالم هاض هو الحي العظيم(الله)

اما العالم الثاني

فهو نظير للارض بل هي ارض ثانيه بس هي على عكس الارض هي ارض سلام. ولكن هل عالم ممكن نحكي فيه انه بتكون في كمان الاجساد تعيت الناس عكس العالم الاول، وبهل عالم بكون في حيوانات ووحوش زي الموجوده بالارض، والناس اللي هناك بعملوا كل اشي بس بدون نجاسات (زي الجنس)

وطبعا بالنسبة لهل عالم في كثير كلام فيه وفي خلاف فيه كثير بتفاصيل ففي بعض العلماء قالوا انه مش عالم سماوي بل هو المريخ ! زي الشيخ "هرمز بر انهر" الخ....

النار

بالنسبة للنار فهي كمان بتنقسم لقسمين واحد اعلى واحد اسفل

الاول

الجحيم الاول هو بشبه العالم الخاص فينا بس هو بدون اي فايده والانسان بظل يحاول فيه يحاول يصلح بس مش بقدر فالعالم هاض محكوم من "الروها" وكمان من الكواكب. المهم هل الجحيم شو مايعمل في الانسان على الفاضي فهو مليون شر .

الجحيم الثاني

في هاض العالم بتتعذب الارواح وبتظل تتعذب لحد ماتتظهر من الخطايا.(وبحكي البعض انه بعد العذاب بتروح الروح وبتدخل الجنة،بس انا مش متأكد بصراحه من هل موضوع)

٣- الهدف من الحياة

الهدف باختصار هو الخروج من هل عالم الغير ظاهر لعالم النور، فالعالم المادي ناقص ، وكله ظلام وشر .

وطبعا سبب الظلام والشر بل سبب خلق الانسان وخلق بعض الكائنات بالغلط!

هو ملاك !

اه الصابئة مايامنوا انه الله هو اللي خلق الكون او الانسان !

بل الخالق هو ملاك اسمه "بثاهيل" بل حتى الكتاب الكنزانيا يقول انه
بثاهيل خلق العالم عن رغبة حمقاء!

وياريت بس هيك في مخلوقات انخلقت بالغلط وهي مش كامله زي الدجاج
!! (رجعوا بهل موضوع كتاب عزيز سباهي - اصول الصابئة ص ١٥٨)

فعشان هيك صار لازم الانسان يحاول يطلع من هل عالم المادي ، والطريقة
هي عن طريق التخلص من الجسم المادي .

٤ - فكرة الله.

الله عندهم وجوده زي عدمه !! فهو حرفيا بعملش اشي ، كل الشغل على
الملائكة فالملائك بتتزوج بين بعض ! وبتتقاتل بين بعض وربنا مايدخل
بشي .

زيه زي وحدة الوجود ، بس هو الاله مشخص هي الفرق بينه وبين وحدة
الوجود.

٥ - الكتاب المقدس.

كتاب المقدس الاله هو "الكنزانيا" وثابت بتاريخ انه كتابهم تحرف !
ودخل عليه تعديل كثير !

وطبعا سبب تحريف كتبهم انه :

١ - كتبهم كانت بس بأيد الكهنة وماكان العامه يمتلكوه هاي الكتب.

٢ - لغة كتبهم اغلبها مكتوبه باللغة المندائية ، وماحد بعرف هاي اللغة غير
اصحاب الكهنة.

٣- كتبهم كانت مش مجمعه غير بعد الفتح الاسلامي !

فهم كانوا يتعرضوا لكثير عنف من المسلمين، وكان المسلمين يقتلوا منهم ويسبوا بعضهم ! فصار لازم على الصابئة يلاقوا حل فعرفوا انه في بالقران ذكر لصابئة ، فقالوا انهم هم هضول المذكورين بالقران بعد هيك جابوا كتبهم وعرضوها على المسلمين عشان يعملوا حالهم من اهل الكتاب.

٤- بعترفهم هم نفسهم ، انهم حرفوا دينهم عشان كانوا خايفين من المسلمين .

المصادر للي بحب يراجع:

موسوعة الميسرة في الاديان والمذاهب ص ٣١٧-٣٢٧

الغاز الانجيل فراس السواح ص ٣٣٣-٣٣٤

اصول الصابئة ص ١٥٨

الكنزا ربا

المثولوجيا المندائية خزعل الماجدي ص ٤٠٧-٤١٢ + ٧١

البيونية

تعتبر البوذية واحده من اهم الاديان بالعالم فهي رابع اكبر دين بالعالم اليوم. وغير هيك بنشوف اليوم كثير ناس مش بوذين (ملحدين) مع هيك ملتزمين بفلسفة بوذا الاخلاقية بل بنشوفهم بشجعوا الناس على بعض الممارسات الدينية والطقوس الخاصه بالدين البوذي! من هاي الطقوس (اليوغا).

فمين بوذا ؟

وشو كانت فكرة الدين عنده ؟

هسه هنعرف

١- المؤسس.

يعتبر الأمير "سيدهارتا" هو المؤسس الفعلي للبوذية ، مع انه في قبله كثير ناس تم تسميتهم بالبوذا (وبتعني كلمة البوذا المستتير) ولكن احنا لما نحكي بوذا فحنا قصدنا عليه هو . سيدهارتا ماكان طول عمره بوذا بل كان انسان عادي جدا وكان عايش حياة جدا مريحه ، لحد بيوم من الايام قرار يطلع مع القصر تاعه مع واحد من القصر ، لما طلع شاف الناس بتكبر بالعمر عشان تموت ، وشاف واحد ماسكينه الناس بدهم يدفنوه ، وشاف الفقر والجوع . هل رحلة حياة بوذا كثير فبسببها صار يفكر بطريقة عشان يهزم العالم اللي احنا فيه ، فالعالم بدون فايدة كله موت وقرف ومشاكل وشر . بعد هل رحلة ترك بوذا اهله وترك القصر وترك مرتته ولحق برجال الدين الهندوس "النساك" وبلشت هون رحلة بوذا ، وبعد ٦ اسنين من حياة التقشف اكتشف بوذا انه غلط ! فهو كان اكثر واحد في النساك

ملتزم وكمان كان يضغط على حاله بشكل كبير، عن طريق الصوم وكمان السهر، هل اشياء جعلت من بوذا ضعيف كثير، وياريت جابت نتيجة بالاخير استسلم بوذا بعد ماغمه عليه! بعد هيك قبل صحن رز من بنت.

وهون عرف انه هو غلط! ولما اكل صحن الرز وخلص راح قعد تحت شجرة تين، وحلف يمينا انه مش قايم لحد مايصير مستتير. وهون صار اشى غريب كثير، ظهر قدام بوذا بعض البنات اللي حاولوا يخلوا بوذا يشتهي بس بوذا ماهتم فيهم، بعد هيك اتحولوا البنات لشياطين وظهر ملك الشياطين! وهجموا على بوذا، وفي اخر لحظة لما قربوا يوصلوا له بوذا تحولوا كلهم له ورد!

فبوذا صار مستتير وصار بوذا .

المهم هاي القصة في كل المراجع هي هي نفسها وين ماتروح بس انا ختصرتها .

٢ - فكرة ماذا بعد الموت

بالنسبة لماذا بعد الموت فبوذا ماكان واضح بهل موضوع ! زيه زي فكرة وجود الله ماوضح اشى فصعب تعرف شو بعد الموت الواضح انه مافي اشى! ممكن افضل نص بشرح هل موضوع هو هل نص على اللسان بوذا : ضعوا نصب اعينكم ما أكدته لكم وميزوه عما لم أكدده لكم.فأنا لم أؤكد لكم أن العالم قديم ولم أؤكد لكم أنه حادث.لم أؤكد لكم بأن العالم زائل ولم أؤكد لكم بأنه أبدي. أنا لم أؤكد لكم بأن الروح والجسد شيء واحد ولم أؤكد بأنهما شيان. لم أؤكد لكم أن المنتور يتابع وجوده بعد الموت ولم أقل أنه لا يتابع وجوده بعد الموت، أو يصير إلى حالة لا هي بالوجود ولا بالعدم.أما لماذا لم أؤكد لكم هذه الأمور فلأنه لا فائدة منها ولا علاقة لها بأساسيات تعليمي. وبالمقابل فقد أكدت لكم أن وجود الإنسان شقاء وأشرت إلى سببه

وعلمتكم الطريق إلى رفع الشقاء عنكم. أما لماذا أكدت لكم هذه الأمور فلأنها ذات فائدة ولأنها ذات صلة بتعليمي ، إنها تزيل الرغبة من نفوسكم وتهبكم المعرفة والحكمة العليا التي تقود إلى النيرفانا.

زي ماهو واضح من كلام بوذا مافي اشي واضح في ما يخص بعد الموت ،ولكن بوذا كان بأمن بالنرفانا وهي الانعتاق او انعتاق الروح ، ممكن نحكي بشكل عام انه فكرة بوذا انه في حقيقه او نور داخل الانسان (بشبه الغنوصيين شوي) واللي بوصل لهاي المرحلة "النرفانا" بصير اشبه بالالهة ! وبتخلص من العالم المادي المقرف هاض.

(مش كل الناس المختصين بشرحوا الموضوع بهل طريقة بس انا شخصيا هيك شايف فكرة بوذا عن النرفانا)

٣- الهدف من الحياة

الهدف الهروب من العالم المادي المقرف ،فالحياة بدون فايدة الحب ملهوش فايدة ،انك تحب ابنك برضه ملهوش فايدة ،انك تحب زوجاتك برضه ملهاش فايدة بل العكس المفروض لا تحب حد!

عشان الحب بجيب الضعف والشقاء ،وفي المرض وفي مليون طريقة عشان تخلي حبيبك يبعد عنك او يموت ! وهل موضوع بجيب الشقاء وبوقف قدامك وقدام التنور،ممكن افضل طريقة عشان نشرح هل موضوع هو بالقصة المشهور عن بوذا اللي بتحكي :

جاءت امرأة لبوذا باكية بعد أن فقدت حفيدها الغالي .

فسألها البوذا :كم يوجد من الناس في مدينتك؟وعندما تلقى جوابها

قال: أو تريد أن يكون لك أحفاد بعددهم ؟

قالت: نعم ،نعم .

فقال لها البوذا بلطف :ولكن إذا كان لديك أولاد وأحفاد بعدد هؤلاء فسوف تبكين كل يوم ،لأن الناس يموتون كل يوم في مدينتك .إن الذين لديهم مئة شخص عزيز لديهم مئة بلوى،والذين لديهم عزيز واحد لديهم بلوى واحدة ، والذين ليس لديهم شخص أو شيء عزيز ليس لديهم بلوى.

المختصر فش هدف بشكل واضح غير التخلص من العالم الغبي هاض عن طريق النرفانا بس.

٤- فكرة الله

بوذا ماتكلم عن الله ! ففكرة وجود الله غير موجوده ! بس في بعض التلميحات ببعض القصص البوذية بتصور انه بوذا بأمن بوحدة الوجود يعني انت الاله وانا الاله والشجر الاله وكل اشى الاله ! ممكن بسبب انه هو بالاساس كان هندوسي . الله اعلم بس طبعا هاي نظرية انا شخصيا مش متأكد منها (انه بأمن بوحدة الوجود) الثابت انه ماكان بأمن بالله.

٥-الكتاب المقدس

مافي لبوذا كتاب مقدس ! زيه زي المسيح ماكتب اشى ! فبعض الباحثين حتى بسبب هل موضوع بشكوا بوجود بوذا اصلا من ناحية التاريخ!!

ولكن بحسب الموروث البوذي انه بعد موت بوذا بفترة طويلة كثير ،بلشوا تلاميذ بوذا (وبعض المصادر بتحكي تلاميذ تلاميذ بوذا) يجمعوا حكم بوذا.

بس على كل حال هاض مجرد كلام مافي دليل انهم هم اللي جمعوا اي اشي عشان مافي تواتر بالاخبار ،وفي انقطاع حاد. (على بلاطه محرفه الكتب)

وهاض هو مختصر البوذية

حاولت اختصر فكر بوذا بس الموضوع والله صعب كثير عشان لحد هسه افكار بوذا بين العلماء بل بين البوذيين نفسهم مش مفهومه،ممكن اكبر دليل على انه الدين مش مفهوم ،انه اليوم في ختلاف بين البوذيين على طبيعة بوذا،فبعضهم بقول انه بوذا الاله ،وطائفة ثانيه بتحكي بوذا مش رب . والمشكلة بوذا لا قال انا الله ولا قال انا مش الله.

المهم المصادر اللي شفتها وانا بكتب بالكلام :

دين الانسان ص ٢٨٢-٢٩٢

الله والكون والانسان ص ٢٢٥-٢٢٨

فصول في اديان الهند ص ١٣٠

اقوم وقبلا ص ٧٢-٧٣

الهندوسية

تعتبر الهندوسية واحدة من اقدم الاديان في العالم، وهي كمان تعتبر واحدة من اكبر اديان العالم اليوم في حوالي مليار هندوسي. وطبعا الهندوسية هي تطور من مجموعة معتقدات، فهي بالاساس بدمج دين الهند-أوربية اللي دخلوا الهند، مع اديان الشعب الهندي. وهل دمج عمل الهندوسية. وطبعا تم تطوير كثير معتقدات مع الوقت. وهل موضوع باب كبير كثير ومافي مجال للكلام فيها هسه.

(راجعوا موسوعة الاديان للدكتور فراس السواح للي بده تفاصيل)

١- المؤسس.

مافي مؤسس واحد للهندوسية بل هي عمل طوائف وعمل جماعات، وهل موضوع مشكلة كبيره، فبسببه مافي اتفاق على ولا اي اشي بالدين ولا حتى على فكرة الاله!

٢- فكرة ماذا بعد الموت

زي ماحكيت مافي اتفاق على اغلب الاشياء بالدين، لكن مع هيك في اشيء اساسية عندهم، ومن هاي الاشياء "تناسخ الارواح" وتناسخ باختصار، هو انه الانسان لما يموت ما بروح لا على الجنة ولا على النار بل بروح و يرجع على الدنيا بس بشكل ثاني!

يعني انت هسه كويس وبتعمل كل اشي كويس، لما تموت بترجع على الدنيا بس على شكل كاهن هندوسي، اذا كنت مش كويس بترجع على الدنيا على شكل شخص عاجز، بل ممكن حيوان.

٣- الهدف من الحياة

الهدف من الحياة هو التخلص من سلسلة الولادات (شرحها فوق) وبصير هيك عن طريق "الكارما" وهي الفعل او العمل. وممكن نحكي

انها اشبه بل العجله بتدور من الموت وتجديد، وهل موضوع يشمل الزمان والعالم.

ولازم الانسان يحاول يطلع من هاي العجلة، والطريقة عن طريق المعرفة !
والمعرفة هاي بتقود الانسان بالاخير للانعتاق، يعني من الاخر وعلى بلاطه ((فش رب انت هو الرب!)) فكل واحد فينا هو جزء من الاله (اذا صح التعبير)

(ملاحظة طلعت عيني وانا بحاول اشرح هل موضوع ههه)

٤- فكرة الله

فكرة الله مش اشي اساسي عند الهندوسي!

اه والله عادي تكون هندوسي ومابتعبد الله او تحكي فش الله! وممكن تكون موحد، وممكن تكون معدد الموضوع حسب مزاجك.

ولكن مع هيك

في ٣ الالهة اساسيه بالنسبة ليهم (تسألنيش كيف)

براهما

وهو العقل الكوني ممكن نحكي، وهو اللي خلق الكون عنن طريق التأمل
تاعه، وهو حرفيا وجوده زي عدمه واحد! فهو بس بظل يتأمل بحاله بس
ومابدخل بالكون.

فشنو

وهو الحامي، وحسب اساطير الهندوسية براهما طلع من زهره طلعت من
بطن فشنو!

ويعتبر فشنو واحد من اهم الالهة الهندوسية،فهو بظل ينقذ العالم عن طريق التجسد فهو تجسد بشخصية "كريشنا" وتجسد في "راما" وتجسد مره "بسلفه" بقصة الطوفان .

شيفا

وهو إله الدمار،وهو كمان رب الرقص! فهو بخترع رقصات،ويدمر العالم كله عن طريق الرقص! (لحد مايقنتله فشنو كل ابصر كم سنه)

والالهة عند الهندوس بتنقتل عادي،وبتنقاتل بين بعض،وبتزوجوا عادي،فيهم بشكل عام كثير صفات بشرية.

٥-الكتاب المقدس

بالنسبة للكتب فالهندوس عندهم كثير كتب بشكل كبير حتى الدكتور فراس السواح عنده قصة مع هاي الكتب. بحكي الدكتور فراس :

عندما كنت مقيماً في الإمارات العربية،طلبت من صديق هندي ذاهب في إجازة إلى موطنه أن يحضر لي معه الرج فيدا معتقداً أنه مجرد كتاب في ثلاثمئة أو أربعمئة صفحة.وعندما عاد،دخل إلى مكتبي ومعه علبة ثقيلة ينوء بحملها فوضعها أمامي قائلاً: هذه هي الرج فيدا.وكانت في نحو عشرة مجلدات ضخمة يحتوي كل منها على ٤٠٠ صفحة،وترتب علي أن أدفع مقابلها ثمناً باهظاً لم أكن أتوقعه.

المهم مختصر كلام الدكتور فراس انه عندهم عدد ضخم من الكتب ،ومافي بصراحة مجال هسه ادخل بتفاصيل تعونهم ،ولكن كمختصر هاي الكتب تم تعديل عليها والاضافه عليها بسبب انه مافي مؤسس! فكانت كل طائفه تعدل عليها وتحط شروح ،والشروح صاروا نص مقدس مع الوقت. فعدم وجود مؤسس خله كل واحد يبدع .

وكمان الدين الهندوسي هو دين قديم كثير ولكن الكتب حسب بعض العلماء عمرها اقل من ٣٠٠٠ سنة بس !

وهاض هو المختصر

بصراحه ماظن اني اعطيت الهندوسية حقها،فهي دين جبار كثير وصعب انك تختصر افكارهم ،وانا مابدعي انه شرحي لمعتقداتهم صح ١٠٠% بسبب انه افكارهم صعب الواحد يستوعبها ،وانا حكيت بحسب فهمي الخاص لدينهم.

المهم المراجع

الله والكون والانسان ص ٢٠٣-٢٠٤-٢٠٥-٢٠٦-٢٠٧-٢٠٨

دين الانسان ص ٢٧١ (الفصل كامل تاع الهندوسية)

اسرار الالهة والديانات ا.س.ميغوليفسكي ص ١١٠

اديان الهند الكبرى ص ٣٧

#ش_مختصر_الاديان

اليهودية

تعتبر اليهودية واحدة من اهم الاديان في الشرق القديم، وسبب تميز اليهودية انها مشتهر بكثير مراحل من التطور وعاصرات كثير احداث، من ناحية التاريخ ومن ناحية الاديان، ومرة اليهودية بكثير مراحل من التطور وتغير على مره السنين. وتعتبر هي كمان الدين الخاص بشعب بني اسرائيل (يعقوب) ولكن مع هيك ممكن تصير انت كمان يهودي اليوم !! عن طريق تعلم اللغة العبرية ودراستك للتوراة، ولكن راح تظل يهودي درجة ثانيه.

١ - المؤسس.

يعتبر "موسى" هو المؤسس الاساي لدين اليهودية وسبب يرجع انه اسفار موسى (سفر يعني كتاب بس راح نحكي انه سور عشان نقرب الصورة للناس)

الخمسة هم اللي عملوا اساس الدين اليهودي، فافيهما كل الاشياء (اهم الاشياء) في ما بتعلق بالحرام والحلال وملابس الكهنة الخ الخ.

ولكن من وجهة نظري الشخصية مش بس موسى او موشي هو المؤسس الوحيد بل كمان "داود" و"سليمان" اللي علموا الهيكل، ممكن نحكي انهم ليهم دور في ما يخص حماية المعتقدات اليهودية بسبب الفتره اللي حكموا فيها.

وكمان في مؤسس ثاني وهو حرفيا اهم واحد واهم حتى من موسى وهو "عزرا الكاهن" وسبب يرجع انه بوقت من الاوقات التوراة او التناخ ضاعت بعد السبي البابلي من "نبوخذ نصر"، وبهل وقت التوراة ضاعت. لحد ماظهر عزرا الكاهن وكتب كل التوراة من اول وجديد ومن الذاكره!. ولازم نحكي انهم اليهود والمسيحيين مابتعتروا عزرا نبي !

٢ - فكرة ماذا بعد الموت

بالنسبة لفكرة ماذا بعد الموت فمافي اتفاق بين اليهود لحد الساعه على شو
في بعد الموت !

بعض الطوائف قالت انه الواحد بموت وخلص ببطل موجود ،بعضهم قال
بتناسخ الارواح ،بعضهم قال بوحدة الوجود ،بعضهم قال انه الناس بدخلوا
جنة ونار .

وسبب بهل اختلاف يرجع انه اسفار التوراة ماكانت واضحه من الاول يوم
،عشان اسفار موسى ال ٥ ماكان فيهم كلام كثير عن شو بصير بالواحد بعد
مايموت ،فكرة ماذا يحصل بعد الموت اجت بوقت متأخر كثير بسفر اشعيا!
بل حتى مفهومهم عن الجنة والنار كان بسبب تأثير علماء اليهود بالاديان
ثانيه زي

"موسى بن ميمون" اللي كان متأثر بالعرب وبالاسلام.

وهاض المختصر في مايخص ماذا بعد الموت للتفاصيل اكثر عن معتقد كل
فرقه وهاض الكلام راجعوا كتاب (التلمود اسرار وحقائق ص ٥٨٠-٦١٧-
٦٢٥) تكلم عن الموضوع بتفصيل الملل.

٣- الهدف من الحياة

الهدف الوحيد من الحياة هو عبادة الله من جهة بني اسرائيل وهل موضوع
بل مقابل راح يخلي إله بني اسرائيل لا يغضب عليهم !
اوضح اكثر

كان شعب بني اسرائيل كل مايكفر ويعبد الاله غير "يهوه" كان يبعثلهم قوم
ثانين يتسلطوا عليهم !

يعني اعبدني واطقي شري !

وفي المقابل قالت بعد الطوائف انه عبادة الله راح تتطول العمر للشخص
(كون مافي حياة بعد الموت عند بعضهم)

فمن الاخر ممكن نحكي عبادة الله.

٤- فكرة الله

بصراحه هل موضوع معقد شوي ،فنصوص التوراة بتصور شعب بني
اسرائيل بعترف بوجود الالهة ثانيه! (خروج ٢٠ - الخروج ١٥-يشوع ٢٥-
مز امير ٧٧-٥٠)

بس مع هيك هم بدهم يفردوا "يهوه" بالعباده

يعني انا هعبد يهوه وباقي الالهة مليش دخل فيها وهم موجودين!

يعني موضوع انهم موحدين مش صحيح ١٠٠% وكم ان فكرة او النصوص
التوحيديه طلعت برضه بوقت متأخر جدا جدا اللي فيها توحيد خالص ،(سفر
اشعيا)

بالنسبة لصفات الرب عندهم ،فهو حرفيا صفات انسان !

بحكي سفر التكوين انه بعد ما خلق الله الانسان قال (وكذلك نعمل الإنسان
على صورتنا كشبهنا) وبرضه

شعره أبيض كالصوف ولباسه أبيض كالثلج وتحت رجليه العبيد وفي نار
بتطلع فمه والدخان من أنفه ويركب على الكروبيم.(سفر دانيال ،وكم ان
الخروج في قصة تابوت العهد)

وياريت بس هيك هو كمان حرفيا نحدود العلم!

فبقصة ادم وبعد مايوكل ادم من الشجرة ،بهرب وبعد هيك بصير الرب يدور
عليه ويحكي : اين انت يا ادم ؟؟؟؟
يعني الله بدور يعني مش عارف
وكثير صفات زي الندم.

٥-الكتاب المقدس

بالنسبة لكتابهم المقدس التناخ او التوراة

مافي اتفاق على الكتاب من اول يوم ! ففي طوائف بتأمن بس بسفار موسى
الخمسه في طوائف بتأمن بسفار موسى + سفر يشوع ،في طوائف بتحكي
انه في اسفار ثانيه ضاعت الخ ..

ومن ناحية المخطوطات فغلبها مخطوطات جديده نسبين مع الصور اللي
بتصورها التوراه

يعني

التوراة لما تقرأ فيها بتشوف احداث كثير قديمه ،مع هيك المخطوطات كلها
بترجع لتواريخ جديده نسبين مع هاي الاحداث

وكمان احنا مابنعرف مين كتب اغلب اسفار التوراة!

اه والله مابنعرف مين كتب اغلب الكلام اللي فيها!!

بس في اجماع على انه اول خمس اسفار كتبهم موسى

والمشكلة انه اسفار موسى بتحكي انه موسى عبد الله راح ومات بالمكان
الفلاني! كيف هو الكاتب وبحكي انا موت هون ؟

وعندهم كثير كثير مشاكل بصراحه بالكتاب بس هاض هو المختصر.

المراجع اللي شفتها:

الله والكون والانسان ص ٩٠

التلمود اسرار وحقائق ص ٥٨٠-٦١٧-٦٢٥

مقدمات العهد القديم ص ٢٤

تاريخ الكتاب المقدس ص ٥٤

التوراة او التناخ خروج ٢٠ - الخروج ١٥- يشوع ٢٥- مزامير ٧٧- ٥٠ سفر
عزرا

#ش_مختصر_الاديان

الزردانية

الزرادشتية هي اول دين بكتب سيرة المعلم الخاص فيها (يعني سيرة النبي
تاعها) وتعتبر هي واحده من اقدم الاديان في شرق القديم ،طلعت هاي
الزرادشتية في بلاد فارس (ايران حاليا) وكانت الدين الراسمي لوقت طويل
كثير ،لحد ماطهر الاسكندر المقدوني ودخل بلاد فارس ،ولما دخل حرق كل
كتب "الافيستا" الكتاب المقدس لدينهم ودمر معابدهم ،وضاع بسبب
الاسكندر كثير كثير كتب واشياء بسببه ،بعد هيك (وممكن قبل) اندمج الدين
الزرادشتي مع المجوس ،فاللي بقراً بسيرة زرادشت راح يعرف انه هو
اصلا ظهر عشان يحارب المجوس ،ولكن مع الوقت ومع ضياع كثير
مصادر عن الزرادشتية اطر اصحاب الدين انهم يقتبسوا بعض الطقوس
المنتشرة (يعني نقلوا من المجوس عشان مايخسروا الناس) وكمان صار
تحريف ثاني لدينهم بسبب الاسلام! فالمسلمين لما دخلوا بلاد فارس هم
كمان حرقوا كثير كتب لزرادشتين(حسب علمي ممكن اكون غلطان) فهون
انجبر الزرادشتين مره ثانيه انهم يقتبسوا من الاسلام (بعترفهم)
فنقلوا بعض الطقوس الاسلامية ،ومع هيك اي حد مطلع على الزرادشتية
الموجوده اليوم راح يشوف اختلاف كثير كبير بينها وبين الاسلام
،وللاسف مش هاض هو الوقت المناسب للتفاصيل.
وبدعي بعض الناس منهم الدكتور "فراس السواح" انه اليهود نقلوا من
الزرادشتين فكرة الشريعة !
فاللي بقراً التوراة بعرف انها بتحكي انه الزرادشتية انتشرة كثير ايام
"نبوخذ نصر" فلما صار السبي البابلي وضاعت التوراة ،"عزرا الكاهن"
نقل من الزرادشتين فهو كان عميل عند الزرادشتين!
وانا شخصيا ضد النظرية بس حبيت احكيلكم عليها .
١ - المؤسس.

يعتبر زرادشت هو المؤسس لدين الزرادشتي ، وهو كان يبشر بإله اسمه
"اهورامزدا" وهو الإله الخير

وكان هو الأساس لحد ما صارت قصة خلق الانسان (بنحكي فيها لما نحكي
عن الإله) وكان زرادشت عدو للمجوس ! وكان ضدهم بشكل كبير
وحاربهم ، بس بالآخر اندمج الدينين مع بعض وهل موضوع كبير ومش
وقته ، كان زرادشت يبشر بالدين بين الناس بس ما حد سمع منه ، لحد بيوم
من الايام الملك تاع الدوله اللي هو فيها الحصان تاعه مرض ! فراح
زرادشت وقال : اذا انا عالجت حصانك بدك تنشر ديني . المهم الملك وافق
، وعالج زرادشت الحصان ، وهيك انتشر دين زرادشت ، ومع الوقت صارت
حرب كبيره كثير (اظن كانت بين المجوس والزرادشتين) وكان زرادشت
يعالج الناس بالحرب (كونه هو دكتور اصلا) ومات بالحرب للاسف!
بعد هيك بلش الكهنة الزرادشتية يخبصوا بالدين ويحرفوا عليه .

٢- فكرة ماذا بعد الموت

فكرة ماذا بعد الموت فيها تشابه بينها وبين الاسلام ،(الصراط
كمثال)وسبب يرجع عشان هم اقتبسوا زي ما حكينا من الاسلام ، ولكن مع
هيك في بعض الاشياء اللي بتختلف زي موضوع انهم بأمنوا بموضوع
الاعناصر الاربعه ، وبأمنوا انه جسم الانسان ملوث فمش لازم الانسان
يندفن بالارض عشان راح ينجسها !

فشو بعملوا ؟

ببساطه عندهم اشي اسمه "ابراج الصمت" هاي الابراج اي واحد بموت
بحطوا فيها عشان الصقور توكل الانسان الميت!!!!

(باقي الافكار عندهم فيها كثير تشابه بالاسلام ففش داعي نحكي عليها،بس
كلها ملهاش اصول عندهم حسب علمي الشخصي ،فهي من التحريف والله
اعلم)

٣- الهدف من الحياة

بشكل عام الهدف من الحياة هو مساعدة الاله!!!! اه والله عنجد بحكي
فبقصة الخلق عندهم بعد ما خلق الاله الانسان ظهر الشيطان! وخرّب كل
اشي وصار لازم يكون في قوة خير وشر ،الخير بتجسد بالرب ،والشر
بتجسد بالاله ثاني ، (وفي بعض النظريات بتحكي انه من هون ظهرت فكرة
الشيطان بالاديان،فالاله صار شيطان ،مع انه هل كلام مش صحيح عشان
في ذكر للشيطان قبل الزرادشتية بل الزرادشتية نفسها بتذكر الشيطان
وبتفصل بينهم الاثنين،ماعلينا)

فالمختصر الهدف هو انه الانسان يحاول يحفظ التوازن بين عناصر الارض
٤ (الارض،الماء،النار، الهواء) وللازم يحافظ على التوازن عشان رب
الخير يهزم الاله الشر.

ولحد كمان ما يظهر المخلص ! فهم بأمنوا انه في مخلص راح يظهر
بالمستقبل وراح يكون مولود من عذراء!! ((ملاحظة انا مالقيت مصدر
زرادشتي واحد بحكي هل كلام ،بس المعلومه منتشره فحببت احكيها
،وللازم نوضح اني انا شخصيا بشوف انه المخلص الموعود عندهم هو
"النبي محمد" بسبب انه صفات المخلص بتشبه صفات نبي الاسلام))

٤- فكرة الله

اللي بقراً بسيرة زرادشت مش هيلقي كلام عن وجود اكثر من رب واحد! فهو كان موحد (وانا شخصيا بشوفه نبي) ولكن التحريف خله في اكثر من رب واحد للشر واحد للخير! وبتحكي القصة عندهم بشكل مختصر، عن ظهور الاله الشرير: انه بعد ماخلص "اهورامزدا" من الخلق، صحي الشيطان(الشيطان هو الاله الشر) من النوم، وشاف افعال الله فبلش يخرب كل اشى وطلع على السماء وبلش يخرب النجوم، ونزل في البحر وخرب الماء، وخرب المدن وخلاهم صحاري، وخلق بعض الحيوانات زي الأفاعي والعقارب وكل الكائنات المؤذية، وكمان خرب النار فصار فيها دوخان، وقتل الانسان الاول فصار في موت. وهيك صار العالم في حرب بين الخير والشر، بين النور والظلام. فبعث الرب ملاك اسمه "الأميشا سبينتا" عشان يصلح اعمال الشيطان وبعد هيك اخذ بذور الانسان الاول، وحطها بالارض فنخلق زوجين هم "ماشيو" و"ماشيا" فنفخ فيهم الاله الروح وقال ليهم: انتم سلف البشرية فحافظا على الفكر الحسن والقول الحسن ولا تخضعا للشيطان. بعد هيك ظهوروا مجموعه من الملائكة وجابوا معاهم ملابس ل ماشيو وماشيا وعلموهم كل اشى بنفعهم بالحياة. بس للاسف بعد افعال الشيطان صار العالم في صراع بين الخير وشر وعشان هيك الاله بحتاج للانسان عشان يهزم الشيطان، والطريقة هي بل التزام بتعاليم زرادشت.

٥- الكتاب المقدس

بأمن الزرادشتين بكثير كتب، ولكن اهم كتاب هو "الافيستا" وللأسف وزي ماشرحت فوق الكتاب محرف! اول مره تحرف بسبب فتح الاسكندر، والمره الثانيه بسبب الفتح الاسلامي، والمره الثالثه بسبب الزرادشتين نفسهم.

المراجع

الله والكون والانسان ص ٩٧-٩٨-٩٩-١٠٠-١٤

ارام دمشق وإسرائيل اخر فصل

الأسفار المقدسة في الأديان السابقة للإسلام ص ١٤٤-١٣٦-١٣٧

الافيستنا ص ٩

#ش_مختصر_الاديان

المسيحية

تعتبر المسيحية اليوم اكبر دين من ناحية عدد الناس اللي بأمنوا فيها ، وتعتبر واحده من الاديان اللي لعبة دور كبير كثير من ناحية التاريخ(مش مهم كان سلبي او لا بس لعبة دور) والمسيحية مرة بكثير مراحل تطور ويمكن نحكي انه التطور الكبير اللي صار عليها كان بالغالب بسبب السياسية اللي كانت تصير بهل وقت، ويمكن اكبر شخصية من ناحية السياسية تأثير على المسيحية هو "قسطنطين" اللي اتحول للمسيحية ، وفي بعض المراجع بتحكي (وانا بصراحة مش متأكد من هل موضوع) انه قسطنطين عمل زي دمج للوثنية اللي كانت موجوده ايامه ، وكمان مع الدين المسيحي عشان يرضي كل الاطراف ، ومع الوقت قال انه صار مسيحي، وقال هيك لما كان في حرب ! فبدعي قسطنطين انه كان بيوم من الايام في حرب وقبل بيوم من الحرب هاي (حسب مانا مذكر ممكن اكون غلطان) كان نايم وحلم بأنه الجيش تاعه حاطين زي علامة صليب!! على اسلحتهم ،بعد هيك بيوم ثاني بلشت الحرب ،راح قسطنطين امر الجنود تعونه يحطوا صليب على اسلحتهم زي الحلم وفي الاخير فازوا . بعد هيك صار هو مسيحي ،و طر كمان يعمل زي دمج زي ما حكيت قبل شوي مع الوثنية والفلسفة

الموجوده ايامه مع المسيحية عشان الكل يتقبل الدين من
الوثنيين!

وغير هيك صار في مجامع للمسيحيين وكانوا كل مره
يعدلوا على الدين (وهل موضوع ثابت بتاريخ)
فبالاول كان المسيحيين يأمنوا بالاب بس بعد هيك
بالمجامع صاروا يعبدوا الابن والاب بعد هيك الابن والاب
والروح القدس!!

وظلعوا بقانون الايمان وكثير اشياء
فاللي بدي احكي انه ببساطة وباختصار المسيحية اليوم
،مش هي نفسها مسيحية يسوع المسيح.
اذا لحد اليوم في اختلاف بين المسيحين تقريبا على كل
اشي!

ففي طوائف بتأمن برب واحد اللي هو الاب
في طوائف بتأمن بالابن والروح القدس والاب
في طوائف بتشوف انه يسوع مجرد نبي زي "شهود
يهوه"

في طوائف قالت بصلب يسوع

في طوائف قالت يسوع مانصلب (الدوسيتية
،الباسيليديّة،الكورنثية،المارسيونية)
فالمختصر لحد اليوم في ختلاف على كل اشى حتى على
كتابهم المقدس !!!
وانا شايف انه هيك تعريف فيها بكفي كثير .
١ - المؤسس.

ممکن اي حد اذا نسال مين هو مؤسس المسيحية يحكي
على طول "يسوع المسيح او عيسى"
وللاسف هل جواب غلط!

مؤسس الدين المسيحي هو "شاول الطرسوسي" الي
صار اسمه بعدين "بولس الرسول"
مين بولس ؟

بولس هو شخص ظهر بعد المسيح ، وكان هاض
الشخص صياد مسيحين! وكان يسرق الكنائس !!
وبيوم من الايام كان بولس طالع على الشام (حسب مانا
مذكر اذا في غلط صلحولي بتعليقات) وهناك ظهر نور!
وقال لشاول: شاول شاول لماذا تضطهدني؟

سأل بولس : من انت ؟

رد : انا يسوع !!

بعد هيك بطل يشوف بولس فراح عند واحد بشام هناك وهو تلميذ اسمه "حنانيا" وبعد هيك رجع بولس يشوف ، وقال للتلميذ اللي صار معاه، تلميذ بعد هيك نشر الموضوع.

المهم بعد هل موضوع بولس تاب وبلش ينشر المسيحيه ، وبصراحة لو ماكان بولس موجود ماكانت انتشر الدين المسيحي! وبولس اتعذب كثير بموضوع التبشير!

فهو انسجن اكثر من مره ! بس كان يطلع كل مره بسبب انه هو روماني الجنسية !

وتعرض كمان للضرب اكثر من مره عشان المسيح ، وتعذب كثير.

وكمان غير انه نشر الدين ، هو كمان عمل مفهوم جديد للدين، يعني

هو قال : بدون سفك دم لا تحصل مغفرة. وهو قصده هون انه اللي مايامن بعمل المسيح مش راح يدخل الملكوت ، وكمان بولس شال كثير احكام كانت في شريعة موسى !

اللي قال عليها المسيح :لم اتي لنقذ الناموس
والانبياء، ماتيت لنقذ بل لكمل. وكمان هو شال موضوع
الختان ،وكثير كثير اشياء

وكان بولس يهتم اكثر اشي بحشمت النساء ! فكان يهتم
بموضوع الحجاب وهاي الاشياء ،حتى في كتاب هو كتبه
مع التلميذ اسمه "دسقولية " تكلم فيه بشكل واضح عن
لبسة البنت المسيحية .

المختصر انه بولس هو حرفيا المؤسس للمسيحية ،وهو
شخص عظيم كثير حتى لو كان كذاب او شو ماكان هو
كان شخص عظيم من وجهة نظري .

ولازم كمان احكي ،انه في بعض المصادر اليهودية اللي
تكلمة عن قصة يسوع المسيح ،بتقول انه بولس كان
عميل عند اليهود! وبصراحة انا شخصيا مش مصدق
هل كلام بس بشكل عام مش غلط نسمع لكل (المهم
النظرية موجوده في كتاب التلمود اسرار وحقائق)

٢ - فكرة ماذا بعد الموت

بتأمن المسيحية بوجود

ملكوت (الجنة) وبحرية الكبرى (النار)

وعشان الانسان يدخل الملكوت لازم بس يأمن بعمل

يسوع المسيح على الصليب (زي مابحكي بولس)

اما اللي مابأمن بيسوع المسيح (بذات بموضوع الصلب)

لا هاض بدخل بحرية الكبرى (النار)

٣- الهدف من الحياة

الهدف من الحياة انه الانسان يأمن بعمل المسيح يسوع
على الصليب! يعني يأمن انه المسيح مات عشان يعطي
للبشر فرصة عشان يتوبه ،وكمان يأمن انه المسيح هو
نفسه الله من ناحية الجوهر (فلم هندي مش هتفهم اشي)
وهاض هو الهدف باختصار

٤- فكرة الله

فكرة الله عندهم بصراحة ممكن نحكي انها بتختلف من
طائفة لطائفة

فالاله عند شهود يهوه كمثال " هو الاب السماوي بس"

الاله عند المسيحيين التقليديين هو الابن والاب والروح
القدس وهضول ل ٣ واحد ! (تسألش كيف)

الغنوصيين في بعضهم بشوف بوجود ربين الشيطان
وبحكوا انه هو الاله العهد القديم ،والله كويس وهو الاله
العهد الجديد.

وغير برضه انه في نوع من الختلاف زي ماوضحت
بالمقدمه على موضوع الله،وفي تطور صار على هل فكرة
كمثال:

١- في مجمع نيقية حسب ماذكر (٣٢٥ م) تم تأليه
المسيح !!

٢- مجمع القسطنطينية (٣٨١ م) تم تأليه الروح القدس
وغير هيك

بنفهم انه حتى فكرة الله عندهم مش ثابتة وممكن بأي
وقت تتعدل عادي !!

ولكن بشكل عام لو بدنا نحكي عن فكرة اغلب المسيحيين
اليوم.

فالمسيح هو الله الظاهر بجسد ،يعني الله بده يعطي فرصة
للانسان بعد موضوع ادم ،عشان هيك قرار الاله يجيب

ذبيحة ! تكون هي الذبيحة الكامله كون العهد القديم
(العهد القديم هو التوراة) فيها بعض الاشارات لهل
موضوع .

فالمسيح اللي هو الله بنفس الوقت قدم حاله عشان يعطيك
فرصة.

وطبعا صفات الرب قبل مايتجسد في شخص يسوع
المسيح هي نفس صفات الرب عند اليهود! كون الاثنين
بأمنوا بنفس الكتاب (راجعوا المنشور تاع اليهود حكيت
في باختصار عن صفات الرب عندهم)

٥-الكتاب المقدس

بأمن المسيحيين بكتاب اسمه "الكتاب المقدس" مكون
الكتاب المقدس من قسمين :

"العهد القديم" وهل كتاب بشرح قصة الخلق وكمان
قصة شعب بني اسرائيل وكمان قصص الانبياء اللي قبل
يسوع .

"العهد الجديد" العهد الجديد بحكي قصة يسوع المسيح
او عيسى ، مكون العهد الجديد من ٤ اناجيل
متى ، يوحنا، لوقا، مرقس.

وهاي الاناجيل الاربعه بتحكي قصة المسيح بس كل واحد
بحكي من وجهة النظر تعيته
ولازم احكي كمان

انه لا العهد القديم كتبه يسوع ، ولا العهد الجديد ، فهو
ماكتب اشي !

اما الاناجيل ٤

انكتبوا بعد المسيح بسنين طويله كثير! وياريت بس هيك
،مش بس هاي هي الاناجيل الوحيدة لا في اناجيل اقدم
من هاي الاناجيل!

زي

انجيل توما ، انجيل مريم المجدلية ، انجيل الطفولة ، انجيل
الناصرين ، انجيل ديداك ، برنابا، يهوذا ، الخ الخ الخ
في كثير اناجيل اقدم وفضل مع اللي مع المسيحين

والمشكلة انه كل واحد بحكي قصة وتفاصيل بتختلف عن ثاني !

لا مش هيك بس احنا لحد ساعه ما بنعرف على اي اساس الكنيسة اخذت الاناجيل الاربعه اللي معاها وماخذوا الباقي ! ما بنعرف سبب الرفض لحد ساعه.

وغير كل هل كلام احنا حتى ما بنعرف مين كتب الاناجيل اللي مع المسيحيين كمان!! اه والله ما بنعرف

فلكتب هاي منسوبه لناس ،بس مين هضول الناس ؟

وشو الدليل على انهم عنجد تلاميذ يسوع ؟

الجواب مافي دليل عنجد كلها فرضيات بدون دليل ،وغير هيك ثابت انه هاي الاناجيل بزيد عليها شغلات وبنحذف منها اشياء !

عشان

١- تدعيم فكر لهوتي ! يعني بدهم يخلوا يسوع يبين الاله فبخطوا كلام على لسانه بحكي فيه كلام بوحي انه هو الله!

(زي النص اللي بحكي انه العذراء راح تولد النص هاض
محرف! وزي النص اللي بحكي انه راح يكون اسم
المخلص ناصرين برضه محرف)

٢- اخطاء بنسخ ! ثابت انه الناس اللي كانوا ينسخوا
كانوا يغلطوا كثير بنسخ ، عشان هيك بلاقي كثير
مخطوطات من الانجيل مختلفه عن بعض بشكل كبير
كثير.

٣- الشروحات ! بهاي الحالة بدخل الشروحات تعون
الناس (اللي بكونوا بالهامش) النص الاصلي !

يعني بكون في زي شرح لموضوع معين ، مع الوقت و
السنين بتم اخذ الهامش على انه كلام مقدس !

٤- الحرق ! بهاي الحالة بتكون في طائفة مسيحية ثانيه
غالبه ثانيه وبتم ساعيتها حرق كتب الخصم !

وانا قرأت مره (وبصراحة مش متأكد من المعلومه) انه
الكنيسة حرقه حوالي ٧٠ انجيل في واحد من المجامع!

٥- ضياع المخطوطات ! ففي كثير مخطوطات ضاعت من
الاول للكتاب

٦- وهاي اهم اشى كان بكل مكان يتم تقديس انجيل غير
اللى بمكان ثاني!

يعني نفرض انا شادي عايش في عمان بأمن بأنجيل
اسمه انجيل برنابا ، عندي صاحب بنفس الوقت اسمه
خالد خالد بأمن بأنجيل اسمه انجيل الطفولة. واحنا الاثنين
عايشين بنفس البلد الاردن تخيل !! هيك صار بالمسيحية
كل مجموعة تتجمع وتكتب انجيل وبعد هيك تقدر
الكتاب.

وممكن افضل حد شرح هو هل موضوع هو كاتب انجيل
لوقا فبحكي الكاتب :

لوقا الاصحاح الأول عدد ١ : ٤

((اذ كان كثيرون قد اخذوا بتاليف قصة في الامور
المتيقنة عندنا)) كما سلمها الينا الذين كانوا منذ البدء
معانين و خداما للكلمة ((رايت انا ايضا اذ قد تتبعت كل
شيء من الاول بتدقيق ان اكتب على التوالي اليك ايها
العزير ثاوفيلس))

وفي كثير اسباب ثانيه ولكن اظن انه هيك بكفي .

المراجع

مدخل إلى النقد الكتابي ص ٢٦

مقدمات العهد القديم ص ٢٤

تاريخ الكتاب المقدس ٦٧-٥٤

الكتاب المقدس طبعة الاباء اليسوعيين مدخل الى العهد
الجديد ص ١٢

أضواء على ترجمة البستاني فاندايك (العهد الجديد) ١١

فكرة عامة عن الكتاب المقدس ص ٢٢

اقوم وقيلا الفصل السادس كامل

الكتاب المقدس

#ش_مختصر_الاديان

الدين المصري القديم

تعتبر الحضارة المصرية واحده من اهم الحضارات في العالم القديم ، ويعتبر كمان دين هاي الحضارة واحد من اهم الاديان في العالم القديم فبسبب الدين المصري القديم تم تطوير على اساس دينها اديان ثانيه. وبصراحة ما بكفي ولا مليون منشور عشان نحكي عنهم ولكن هاي مجرد محاوله لا اكثر.

١ - المؤسس.

ما في مؤسس واحد لدين المصري ، فهو دخل بكثير مراحل من التطور مره على ايد الملوك ومره على ايد بعض المصلحين الدينين امثال " اخناتون " بل حتى الناس والمجتمع والشعب كمان هو طور الدين!

فمن الاخر الدين المصري ملهوش مأسس واحد ، وغير هيك انه الدين المصري ما وصل لينا شو كان قبل ما يتم اكتشاف الكتابه ، ففي فتره كمان ضايعه.

٢ - فكرة ماذا بعد الموت

هاي لحالها بدها مجلدات عشان نشرحها، وانا بنصحكم
عند بكتاب "الرحمن و الشيطان" لدكتور فراس
السواح حاول بالكتاب الخاص فيه يختصر فكرة ماذا بعد
الموت بفصل "فكرة الشيطان في الديانة المصرية"

ولكن كمختصر فكرة ماذا بعد الموت كانت على مراحل :

١- كان بس الخلود بس للملوك، وكمان لخدام الملك
(فرعون قصدي بملك) وكان الملك يعتبر تجسيد له الاله
"حورس". اما البشر العادين فبروحوا زي الشباح على
عالم ثاني زيها زي دين السومري والبابلي.

٢- بعد هيك صار ممكن اي شخص من النبلاء يدخل الجنة
(اذا صح التعبير) ويوخذ الخلود عن طريق التعويذ
السحرية. وبعد هيك صار اي حد ممكن يصير خالد
ويعيش مع الملوك (بفلوسي :)

٣- بعد هيك صار كثير في نفوذ للكهان ، وهاض النفوذ
خلاهم يدخلوا بكل اشى صغير وكبير وصاروا يتحكموا
بالفرعون نفسه . هل موضوع بسببه تم تغير الاله

الاساسي (أوزوريس) وصار الاساسي بدله (راع) ومش بس هيك تم انشاء قصص للخلق جديده.

كل هاي الاشياء بسببه تم (حسب مانا فاهم ممكن اكون غلط :)) خرينا نحكي تفرق الشعب كل واحد اخذله جه وبعد هيك صار يامن بأله شكل ويعمل قصص خاصه فيه ،هاي الثوره كلها بسببها صار لازم الكهنة يتصرفوا ،فربطوا الخلاق بموضوع العبادة اخلاقك كويسة بتدخل الجنة .

وتحول اوزوريس من رب للعالم لرب للعالم السفلي .

٤- وهاي اخر شكل من اشكال ماذا بعد الموت عندهم :

بحسب الاساطير المصريين ،كان "انوبيس" بمسك بأيد الشخص الميت بعد ما يخلص من عبور الاختبارات عن طريق بعض التعويذ السحرية.

بعد هيك بودي على قاعة اسمها "قاعة العدل" ويكون فيها هاي القاعة الاله "أوزوريس" ويكون جالس على العرش الخاص فيه ومعاه الالهة ثانيه.

وبنص هاي القاعة في ميزان كبير وجمب هل ميزان الاله "تحوت" إله الحكمة والكتابه ويكون على هيئة

القرد. وعلى الجبه الثانيه بوقف وحش اسمه "عم" وهو
بواكل الموتى .بمشي الشخص الميت على الالهة
الموجوده بهاي القاعه وبحاول يثبت انه انسان جيد
وبحاول يثبت براءته من ٢ ٤ خطيئة .بعد الفلم الطويل
هاض برجع الميت وبوقف قدام الميزان ،فبخط قلبه في
كفه وفي الثانيه ريشة .بعد هيك يقوم أنوبيس بفحص
النتيجة وبعد هيك بحكي هاي النتيجة لتحوت وتحوت
بسجل وبعد هيك ببلغ اوزوريس .بعد هيك اذا طلع
الشخص مذنب بهجم عليه وحش وببلس يوكل فيه
وبمسح اسمه من الوجود .واذاطع كويس وقلبه صالح
،بعطوا كعكه وخمر وبسمحوه يدخل على الاله الكبير
أوزوريس ويركع قدامه .

وبعض الباحثين بحكوا انه هاي المراحل كانت سبب
بظهور فكرة الجنة والنار بباقي الاديان.

٣- الهدف من الحياة

برضه هل موضوع في تطور ،بس بشكل الاخير هو
ارضاء الاله اوزوريس وهو يعتبر الاله اخلاقي ،يعني

بدك تدخل الجنة بدك تتبع الاخلاق الخاصه فيه ،ويعتبر اول الاله بعمل او يتم ربط الخلاق فيه.

على كلاً ممكن كمختصر ننقل نفس الكلام اللي موجود بكتاب الموتى اللي تكلم عن الخطايا اللي لازم الانسان مايعملها عشان يدخل جنة اوزريس:

لم أقم بعملٍ شريرٍ يؤدي أحداً من الناس. لم أسئِ معاملة الماشية والأنعام. لم أكن قاسياً على أحدٍ من الفقراء.

لم أتسبب بمرض أحدٍ من الناس. لم أتسبب بحزن وبكاء أحدٍ من الناس. لم أقتل ولم أعطِ أمراً بالقتل. لم أتسبب في عذاب أحد. لم أزد ولم أنقص في مكيال الحبوب. لم أغشّ في مقياس مساحة الأرض. لم أحرّم الأطفال من حليبهم. لم أطرّد المواشي من مراعيها. لم أمنع الماء عن الآخرين في مواسم السقاية. لم أضع ردماً أمام الماء الجاري في السواقي. لم أطفئ شعلة نارٍ لأحدٍ وقت التهابها. لم أتناس مواعيد تقديم القرابين. (وفي كثير اشياء غير هضول راجعوا كتاب الرحمن والشيطان ص ٨١)

الدين المصري بشكل عام برضه تم التطوير عليه بفكرة
الله!!

فمره بنشوف انه دينهم بشكل واضح هو دين "ثنوية
كونية" يعني في الاشى والعكس ،الشر والخير ،سيث
حورس.

وبتصور اساطيرهم انه حرفيا في صراع مستمر بين
سيث الاله الظلام وبين الاله أوزوريس ،صراع ابدى
مايخلص .

برضه بتصور بعض الاساطير المتأخره نسيين انه
الاساس هو "راع" بعد هيك اجو باقي الالهة.

برضه بتصور اساطير ثانيه اقدم انه أوزوريس هو
الاساس بس تم نقل ازوريس من الاله (ملك) له الاله
العالم الاخر (الجنة) بعد ماطلعت اسطور بتحكي باختصار
:انه سيث مره من المرات خدع اخوه أوزوريس ،وحطه
بصندوق وبعد هيك قطعه لقطع ،بعد هيك "ايزيس"
جمعت قطع أوزوريس وأوزوريس قرار يظل بالعالم الاخر
وترك الدنيا اذا صح التعبير.

المهم انسوا كل هل كلام ،بتفق الباحثين بشكل عام (وهل موضوع غريب) انه الاله الاقدم كان عند المصريين هو ""سيث"" اه الاله الشرير هو الاساس والقدم كمان.

وعلى الهامش في كمان بشوفوا بعض الناس انه التوحيد هو الاساس كان زي مدرسة "هيلو بولس".

٥-الكتاب المقدس

صراحة مافي اشي ممكن نحكي عليه هاض هو الكتاب المقدس تاعهم ،يعني كتاب كتاب "الموتى" هو بس بحكي عن ماذا بعد الموت مش الدين كدين .

والواضح بصراحة انه مافي كان كتاب دين بل كان العتماد على الكهان (هاي وجهة نظري) عشان حرفيا الثابت انهم عدلوا اكثر من مره على دينهم، وغير هيك فكرة الاساطير بشكل عام ماكان في عليها اتفاق من الاول ،فعادي بتكون انت عايش بمكان وبتأمن انه الاساس راع ،بمكان ثاني بكون انوبيس!

فلو كان في كتاب ثابت كان ماصار هل خربطه كلها .

بس بشكل عام ممكن فكرة ماذا بعد الموت هي الاشئ
الوحيد اللي كان ثابت .

بس هيك

كل المصادر كانت من كتاب فراس السواح الرحمن
والشيطان ص ٨١ ، وكمان موسوعة الدكتور فراس عن
الاديان المجلد الثاني.

#ش_مختصر_الاديان

التأوية

تعتبر التاوية اهم دين ظهر بالصين ،وكمان هل دين كان
سبب بتطور كثير اديان وافكار طلعت بهذيك الفتره زي
"الكنفوشيه" فكنفوشيوس عاصر الحكيم "لاوتسو"
وفي بعض المصادر بتحكي انه تعلم تحت ايد
لاوتسو(مش اكيد هل كلام ،بس الكيد انهم عاصروا بعض
ولاتسو هو الاكبر) وكمان لما دخلت البوذية الصين كمان
كان تأثير حكم لاوتسو على التعليم بوذا واضح ،فمن
الاخر دين بوذا كان هو زي الشارح لحكم لاوتسو، وغير
هل كلام كله لاوتسو كان ماخذ قلوب الصينين وحترامهم
كثير.فهو شخص ليه وزنه عندهم.

١ - المؤسس.

المؤسس هو الحكيم "لاوتسو" وفي غموض كبير كثير
بشخصية المؤسس ،فمافي كثير كلام عليه من مصادر
خلينا نحكي موثوقه ،فكلامه هو مجرد كلام شعبي (يعني
فلان قال له فلان ومين فلان اللي قال الله اعلم هيك قال
سيدي) . ولكن اشهر قصة بتحكي عن لاوتسو هي قصة
كتابة الحكم الخاصه فيه،وهي بتحكي باختصار:كان في
حرب وكان هو بده يطلع من الباب تاع المدينه، فظهر
واحد من الحرس تعون المدينه اللي هو فيها وطلب من

الحكيم لاوتسو انه يكتبه الحكم تعيته وكم ان مفهوم الدين
تاعه! وهيك صار في كتاب تاو-تي-تشبنغ . والغريب انه
هل موضوع كله صار بثواني!

المهم هاض كل الكلام عن لاوتسو او خرينا نحكي الكلام
اللي اغلب الناس بتتفق عليه، باقي القصص في الغالب
مجرد خرافات شعبية.

٢- فكرة ماذا بعد الموت .

ما تكلم عن الموضوع ، وانا شخصيا مش مذكر اني شفت
اي تفصيل عن هل موضوع ، فلاوتسو كان يهتم اكثر انه
يصنع انسان وما كان يهتم لفكرة ماذا بعد الموت. ولكن انا
اظن وهاض اجتهاد شخصي انه كان بأمن بوحدة الوجود
! وهنحكي عن هل موضوع كمان شوي.

٣- الهدف من الحياة

الهدف هو الانسان، فلاوتسو كان يحاول بالحكم تعيته
يصنع انسان صالح عن طريق الخلاق اللي هو بتبناها
والفلسفة الخاصة فيه ، وهو نجح نجاح كبير.

طيب ليش بده يعمل هيك اصلا؟

باختصار عشان الانسان العادي يقدر يوصل للتاو(اللي
احنا اصلا مش عارفين شو هو ! ولا لاوتسو نفسه
عارف شو هو!)

٤- فكرة الله.

بالنسبة لفكرة الله ، لاوتسو نفسه ماكان بعرف شو هو
الله!!

بس كان بأمن بوجود اشى خالق للكون بس شو هو ! هو
مين هو ! او شو بكون ماكان بعرف !

حتى انه هو بحكي عن "التاو" اللي بعنده المفروض:
شيء ما لا شكل له

موجود قبل السموات والأرض

يدور على نفسه ولا يبلى

انه بحق أم هذا الكون

لا أعرف اسمه، أدعوه ال تاو

لا استطيع وصفه . فأقول العظيم

عظمته امتداد في المكان

الامتداد بلا نهاية يعني العودة إلى نقطة البدء.

وانا اظن والله اعلم انه لاوتسو كان بأمن بوحدة الوجود !
ممكن حد يعترض عشان النص واضح انه هو بخاطب
اشي مشخص ! كيف وحدة الوجود ؟ ببساطة انا اظن انه
لاوتسو كان يعتبر الكون هو الاله، بس ماكان عارف
الطريقة المناسبة لوصف الموضوع ،ولازم نحط ببالنا
على فرض صحة القصة تعيت كتابة الكتاب انه هو ماكان
معاه وقت عشان يوضح ويشرح ، وغير هيك الكلام
الخاص فيه عن البداية والنهاية وانه كل اشى لي ماضي
لي مستقبل .

عشان اوضح فكرتي

في نقاش منسوب لكنفوشيوس مع واحد من تلاميذ
لاوتسو وهو بتناقشوا في التاو ،فسأل كنفوشيوس التلميذ
سؤال واضح :وين هو التاو؟ فرد التلميذ (الكلام موجود
في كتاب الله والكون والانسان ص ٢٣٢):

إنه في كل مكان فأخذ الكونفوشي يسأل عن الأمكنة التي
يمكن أن يوجد فيها التاو، فقال التلميذ: نعم نعم نعم. ثم نظر
إلى الأرض ورأى بقية من روث البقر فقال لكونفوشي: لا
تسأل أين يوجد التاو. إنه موجود حتى في روث البقر !!
هاي حرفيا وحدة وجود.

٥- الكتاب المقدس.

بالنسبة للكتب المقدسة، فمافي اشي على حسب علمي
غير كتاب "تاو-تي-تشبنغ" اللي حكيت القصة تعيته
فوق، بتكون الكتاب من ٨١ فصل وهو زي كتاب اناشيد
وهو مش كبير كثير صغير كثير بطلع كله على بعضه
١٠٠ صفحة. وبشكل عام هو كتاب حكم .

المهم بالاخير انا شخصيا بشوف لاوتسو نبي ! بس طبعا
الواضح من هل دين انه تعرض لنوع من التحريف! بل
هو نفسه اصلا الافكار الخاصة فيه ماوصلت بطريقة
صحيحه، وانا شخصيا بعترف انه الموضوع مجرد ظني
وممكن اكون غلط فيه .

المراجع

الله والكون والإنسان ص ٢٢٩-٢٤٤

دين الانسان ص ٢٦١-٢٧٠

#ش_مختصر_الاديان

المانوية

المانوية تعتبر من الاديان التي طلعت في بلاد فارس ،
وتعتبر هي دمج لمجموعة اديان وعقائد التي كانت
موجوده بهل وقت زي
،المسيحية،الزرادشتية،الصابئة،وبعض من الفلسفة .
والمانوية انتشرة بوقت من الاوقات في كل الشرق
الايوسط وكمان بالهند! كون ماني راح هناك ،وممكن
نحكي انه الدين المانوي هو اكثر دين تعرض للعنف في
تاريخ! كون هل دين واجه كثير شعوب وحضارات بهل
وقت

زي

المسيحيين كان يصير حروب كثير بين الاثنين ،وكل مره
كان يخسروا المانوين،المسلمين كمان كانت تصير حروب
بالهبل بينهم.الزرادشتين والمجوس وللأسف كانت نهاية
ماني على ايديهم وهنكي عن هل موضوع لما نحكي عن
المؤسس. وتعتبر المانوية دين غنوصي ١٠٠% ولكن
لي غنوصية خاصه بنشرح هل موضوع بعدين.

١ - المؤسس.

بالنسبة لتاريخ ماني فمافي افضل من شرح الدكتور فراس السواح بكتاب "دين الانسان" فهو عمل زي ملخص لحياة ماني ،وانا هسه راح انقل الملخص:

ولد #ماني لأسرة إيرانية قرب مدينة طيسفون في منطقة بابل ببلاد الرافدين عام ٢١٦ م وترى على ملة أبيه وهي طائفة غنوصية تدعى المغتسلة نسبة لطقوس الإغتسال بالماء، التي كانت تمارسها .وقد جاءه وحي من السماء (على مارواه في كتبه)ينقل إليه تعاليم دينه وهو في سن الثانية عشرة من عمره، ثم عاوده وهو في الرابعة والعشرين وأمره هذه المرة بنشر دعوته ويقال ان ملاكاً هبط من السماء وبلغه الرسالة : فلما تم له اثنتا عشرة سنة أتاه الوحي ،على قوله ، من ملك جنان النور الله وكان الملاك الذي جاءه بالوحي يسمى التوم، وهو بالنبطية، ومعناه القرين فقال له :اعتزل هذه الملة فلست من أهلها ، وعليك بالنزاهة وترك الشهوات ، السلام يا ماني مني ومن الرب الذي أرسلني إليك وإختارك لرسالته ، وقد أمرك أن تدعو وتبشر ببشرى الحق وتحتمل في ذلك كل جهدك .

وقد كان ماني يعترف بقيمة الديانات السابقة عليه ولكنه اعتبرها مؤقتة وغير كاملة، ولذلك أعطى لنفسه لقب (#خاتم_الانبياء) وكان مشروعه الكبير يقوم على صياغة ديانة شمولية تحتوي على الافكار الدينية القديمة ،وتتجاوزها في تركيب جديد قادر على اكتساب الجميع إلى عقيدة موحدة .فلقد تأثر بشكل رئيسي بالافكار الثنوية الايرانية ،ولكنه أخذ العديد من الافكار المهمة عن المسيحية والمثروية والهندوسية والرافدية القديمة ، اضافة الى خلفيته الشخصية الغنوصية ،فجاءت ديانته بحق مذهباً توفيقياً من الطراز الأول،فكان هدف ماني هو توحيد العالم تحت راية دينية واحدة .ويصف ماني بنفسه ذلك فيقول : كما أن نهرا يرفد اخر لتكوين تيار دافق ،كذلك صبت الكتب القديمة في كتاباتي فشكلت حكمة كبرى لا مثيل لها في الاجيال السابقة .

لم يبدأ نشاط ماني التبشيري في بابل كما هو متوقع ، بل في الهند حيث مكث فترة ثم عاد الى طيسفون ،ومن هناك بدأ بارسال حواريه شرقا وغربا تحت حماية الملك الفارسي شابور الذي سمح له بنشر تعاليمه بحرية في كل

مكان من الامبراطورية الفارسية ، وبعث الى الولاية
والحكام لتيسير أمر الدعاة الذي انتشروا من اسيا
الوسطى الى مصر . كما تولى ماني بنفسه القيام برحلات
تبشيرية عديدة ، مؤسسا جماعات جديدة من الاتباع انى
رحل تاركا بين أيديهم نسخا من الكتب العديدة التي
وضعها بنفسه ، التي كان يتباهى بتأليفها قائلا ؛ انه يضع
أناجيله بنفسه على عكس سابقة من أمثال عيسى وبوذا
وزرادشت ، الذين دونت اناجيلهم بعد وفاتهم وبيد
خلفائهم . ولقد ساعدت هذه الظروف وامتداد العمر ماني
الذي عاش حتى سن الستين ، على ترسيخ الدعوة
#المانوية في أرجاء الامبراطورية الفارسية وفي خارجها
. كما أن وفاته لم يؤثر على استمرار النشاط التبشيري
. فنحو الغرب وصلت المانوية والى فلسطين ، ثم انتشرت
على نطاق واسع في مصر ، ومن مصر انتشرت الى
افريقيا واسبانيا ، كما عبرت المانوية من سورية الى
اليونان وايطاليا حيث كانت تصطمم بالجماعات
#المسيحية وبالسلطات الرومانية التي كانت ترى فيها
دسيسة فارسية . اما نحو الشرق فقد وصل التبشير
المانوي الى بلاط الامبراطور الصيني على طول الحرير
الذي توضع عليه جماعات مانوية قوية التأثير . وعن

بلاد العرب يروي ابن رسته خبرا عن وصول البعثات التبشيرية المانوية الى بلاد العرب .

ولقد سار أتباع ماني على النهج الذي اتبعه في مهاجمة #الاديان السابقة عليه ، وقالوا ببطلانها جميعا بعد ظهور الرسالة الحقّة ، ودخلت المانوية في كل مكان في صراع لاهوادة فيه مع العبادات والاديان الشمولية الاخرى .فالى جانب صراعها مع وثنية عصرها المتنورة ريبة الثقافة #الهيلينستية ، فقد دخلت في صراع مميت مع ديانتين شموليتين ، أحدهما شائخة هي #الزرادشتية التي كانت تسعى الى تجديد نفسها من خلال حركة احياء شاملة ، والاخرى فتية هي المسيحية التي كانت تشق لنفسها طريقاً صاعداً باصرار نحو رومة والقسطنطينية .ولقد تلقت المانوية من الزرادشتية أولى ضرباتها القاسية ، عندما مات مؤسسها شهيد دعوته وأعدم أثر محاكمة سورية في بلاط الملك بهرام خليفة شابور ، نتيجة للدسائس التي حاكها له الكهنة المجوس ، ثم جاءت الضربة الثانية باعتناق الامبراطور الروماني قسطنطين المسيحية واعلانها ديناً رسمياً للدولة ، وما تبع ذلك من ملاحقة واضطهاد للمانويين .أما الضربة الثالثة فجاءت

من الديانة الشمولية الجديدة : الاسلام عندما قامت
الخلافة #العباسية في بغداد باستئصال شأفة المانوية .

٢- فكرة ماذا بعد الموت.

باختصار اللي بوصل لنور اللي داخله (بنشرح هل
موضوع كمان شوي) يدخل الجنة وبلاقي الملائكة بتحي
فيه وبلاقي بنت عذراء بتمثل العمل الصالح تاعه ،اما
اللي بفشل فبتسب عليه الملائكة اول اشى وبتبلش تذكر
فيه بالهدف تاعه ،وبرجع بحياة جديدة بجسم جديد
(تناسخ الارواح) لحد ماينجح.

٣- الهدف من الحياة

زي ماحكيت بالمقدمه انه ماني والمانوية هي دين
غنوصي ،فزي اي معتقد غنوصي بأمنوا هم كمان انه
العالم كله شر! والطريقة لتخلص من هل شر هو من
خلال العرفان و الوصول لنور اللي داخل كل واحد فينا.

والقصة تعيتمهم عن الخلاص باختصار بتحكي :انه
الشيطان شاف صنع الله(ادم) والله حط بأدم نور وكان
ناوي على حد تعبير فراس السواح ((استصفاءالنور

المحتبس في المادة الظلامية)) بس لحد هسه ماحظ في الروح.فراح الشيطان وعكس كل عمل الله! فبدل مايتحرر النور ويصير اكثر من الظلام ،ابليس خله النور ينحبس بالانسان وخله الظلام اكثر.

يعني ربنا حظ بادم شوية نور وكان ناوي يطوله ،ويطول كل النور بشكل عام من الظلام يخلي يتحرر يعني ،فراح الشيطان وخله النور ينحبس اكثر بستعمل اثنين من الشياطين و عملوا هيك بادم وحواء .

واللي سهل على الشيطان الموضوع هو انه ادم كان جاهل ! فالنور صعب توصل ليه غير بالمعرفة .

المهم بعد هيك نزل ادم بلا بلا

فبعث الله له ادم وحواء يسوع (مش يسوع النبي يسوع ثاني) عشان يعلمهم الحكمه،بعد هيك بعث كثير انبياء زي "شيث"، "نوح"، "اخنوخ"، "شيم" ، "ابراهيم"، "بوذا"، "زرادشت"، "يسوع" ، "بولس".

من الاخر الهدف هو الوصول لنور عن طريق المعرفة.

٤ - فكرة الله

هل موضوع كمان مش واضح كثير عندي لحد هسه
عشان في كثير خربطه عند الكتاب العرب ،عشان حرفيا
ماني حسب مانا قرأت من كلامه انه هو موحد،بنفس
الوقت وبعطي لشيطان قوة بتوصل لوقت الرب!

يعني ممكن نحكي انه بأمن "بالتنوية" الشي والنقيد
،طبعا هم بأمنوا انه في يوم القيامة راح يحكم المسيح
"عيسى" العالم وراح يرجع كتب ماني(كان بأمن انه
الكتب راح تتحرف :) وراح يتوحد كل العالم ضد
المسيح ،وشياطين راح تتجمع مع كل الشر وكل طاقة
الظلام . وبعد هيك راح يتم هزمهم كلهم ورميهم على
حفرة كونييه وراح ينرمي فوقهم حجر وينتهي
الشر.ولازم احكي كمان ، الله مش هو المسؤول عن الشر
بل المسؤول عن الشر هي المادة ،والمادة هي سبب
وجود الشيطان.

يعني ممكن نحكي انهم نص توحيد :

٥- الكتاب المقدس

ماني هو الشخص الوحيد بتاريخ الاديان حسب علمي الشخصي اللي كان يكتب الكتب الدينيه تعيته بأيده!
وكان هو على فكرة يفتخر بهل موضوع كثير ، فكان يحكي للمسيحيين والزرادشتين الخ الخ
انهم كلهم تم تدوين كتبهم على ايد تلاميذ تلاميذ انبياءهم .

عكسوا هو ، وكان ماني يحفظ الكتب تعونه كويس كثير ، وصل دينه كل الدنيا وكان حتى في ناس بفكروا انه خلص ماني راح يحكم العالم بالدين تاعه، لحد ماقتل على ايد واحد حيوان من ملوك الفرس! (القصة تعيت ماني على فكرة واخر الايام ليه بتموت من الحزن ؛ ()
المهم

برجح الباحثين انه ماني كتب حوالي ١٠ كتب ، و كمان مع بعض الرسائل و كمان ، وهاي غريبه كتب كتاب مصور وشرح فيه الدين تاعه برسم ! كتاب "الشابورقان".

وما ظل اليوم من كتب ماني غير مخطوطات صغيره كثير
لبعض الاشياء، اما الجمل الطويله فقط موجوده عند كتاب
مسلمين امثال "بن النديم" والقديس "أوغسطين" .

وبس كده

المصادر كلها من فراس السواح:

دين الانسان ص ١١٢-١١٧

الرحمن والشيطان ص ٢٣١-٢٥٠

#ش_مختصر_الاديان

المصادر الكتاب

موسوعة الميسرة في الاديان والمذاهب

الغاز الإنجيل فراس السواح

اصول الصابئة

الكنز ربا

المثولوجيا المندائية خزعل الماجدي

فصول في أديان الهند

الله والكون والإنسان

دين الإنسان

أسرار الإلهة والديانات أس. ميغوليفسكي

أديان الهند الكبرى

التلمود إسرار وحقائق

مقدمات العهد القديم

تاريخ الكتاب المقدس

التوراة اوالتناخ خروج- يشوع-مزامير- عزرا

أرام دمشق وإسرائيل

الأسفار المقدسة في الأديان السابقة للإسلام

الأفيستا

مدخل إلى النقد الكتابي

الكتاب المقدس طبعة الإباء اليسوعيين مدخل إلى العهد
الجديد

أضواء على ترجمة البستاني فندايك (العهد الجديد)

فكرة عامة عن الكتاب المقدس

اقوم وقيلا

الكتاب المقدس

الرحمن والشيطان

موسوعة الدكتور فراس عن الأديان المجلد الثاني.